

## **Pɔl e lɛl krɛkrɛ ek'awɲ**

### **Timote**

### **Ów ek'it eke wɛl k'uw any**

Timote el Lisr baɲɲ iy. Lisr el Likaoni wus af ec'eb (Ob Kok 14.6). Yɛfɛnyana em a, Likaoni any Turki em. Timote es a Grɛk iy, ɛtɲ lis el Jwif. Pɔl e juma eke kok Lisr baɲɲ a anake ɔɲ Timote, lis Enis lele la Lois ab itɲɲ erm em el ɛs Kɔtɔkɔ ec'a. Sica eke Pɔl im toɲ bake ɛwl mɛny ow Lisr a, Timote elum'n abu ɛs Kɔtɔkɔ eci juma kok ab em (Ob Kok 16.1-3).

Lɛl na em, s'am ɛkn eke Pɔl igb Efɛs ek'el Azi wus af ec'eb ab em, im Maseduan wus af. Gbɛkɔ in ec'im em a, l'ɛw Timote es Efɛs eke li k'ɛdɲɲ low yɛgm ɛsɛl ayadɲɲ a juma kok (nuɲ 1 toɲ nuɲ 3). Pɔl nɔn lɛl na eke k'atr Timote sos es, ke n'óm ow ów Nyamel e juma eke ow am kok ab af.

Nuɲ 1, nuɲ 4 lele nuɲ 6 em a, Pɔl am dad agɲ a eke am yɛgm ów yadɲ, ke am igɲ low yɛgm nawrɛ a ɛlu es a ec'odad. -Li bi yɛgm agɲ low yadɲ em Nyam ec'ol a lele ɔmn eke wɛl b'ɔny Jesu em ab ab af. Nuɲ 2 em a, Pɔl ibrm eke kretienɛl a kí ɲɔɲɲ Nyam ɛtɲ li yɛgm wɛl low Nyam ɲɔɲɲ af. Nuɲ 3 em a, li dad idr ɛsɛl ec'elɛl eke k'aan es a. Nuɲ 4.7 toɲ nuɲ 6.21 em a, Pɔl am atr Timote sos es eke in e juma kok ab em, li k'ɔb Amani Mamn a e kokoba. N'am dad ow elɛl eke ow ki kokɲ, ke ow ótu am ɔsu Nyamel ec'agɲ abu abu a, ɛsɛ elɛl eke Jesu Krist e jam us ɛs mamn bi kok ab af a. Lɛl a ec'uwr em a, Pɔl

am atr Timote sos es eke ow k'ogŋ ɔmn em eci mum mamn a.

### *Ɛsŋn*

<sup>1</sup> Em Pɔl, Jesu Krist ec'erm es, Nyam ey e Sɔg Ɛs lele Jesu Krist ey ec'ɔmn ob ab ec'abusu em, m'am awŋ'ŋ lɛl na. <sup>2</sup> N Timote eke anŋ ese em ec'iy lokm tasi af ɔmn em, ke Nyam Ɛs lele Jesu Krist ey e Kɔtɔkɔ ab ɛdŋ'ŋ ɔwrɔ, ɔny ŋ e sɔrŋ ikŋ ke ɔŋ'ŋ erm es ey.

### *Erm ew low yegm esel ayadŋu e lís*

<sup>3</sup> Eke m'aam Maseduan a, m'ijl'ŋ nɛny eke k'anŋ Efes, yec'ɛtŋ ke agŋ a ek'am yegm agŋ ów yadŋ a, ɛdŋn el ke -li ki kokmn ij. <sup>4</sup> Dàd el -li wal ów a ek'agŋ el obi ɔkn dad lel el lagŋel e mew ec'es ɔsŋm owi e low a -l'elu es, † ow es atar cɛ ow b'is, ow eluam Nyam ec'es eb elu e low a eke bebŋm ew es, ke wel uw any ɔmn em a abu.

<sup>5</sup> Low na eke b'ow dad a, b'ow ɔŋ el ec'erur a agb: erur eke b'anŋ erm lala em ow, tutr mamn em lel ɔmn tasi em ab a. <sup>6</sup> Agŋ beb igŋ ejagb na elu es ɛtŋ irm sodad ek'ɔnym any e dad em. <sup>7</sup> -Li b'ocr el sosi ese Nyam ec'ol a ec'any uw esel tasi af, gbekɔ -l'irimn el obi e sodad eke -n'am dad a, ɛtŋ ów a ek'ow sosiem -li b'atar ów es a yeji -l'irimn.

---

† **1:4** *el lagŋel e mew ec'es ɔsŋm owi:* ów eke agŋ el obi k'ɔkn a lele el lagŋel e mew ec'es ɔsŋm owi ab ab el nawrɛ em a, Nun Ɔb nun 4 toŋ nun 11 em eci ów a eke anŋ a, (ese agŋ lagŋel e mew ec'es ɔsŋm lele Noe e mij gbɛl a e low ab ab) eke agŋ ot yiyibr ów toŋ ke ow ewl el yadŋ owi a.

<sup>8</sup> S'uw any eke Nyam ec'ol a el ob mamn, eke wɛl uw any kok ow e low ek'it a. <sup>9</sup> Wɛl ókn eke wɛl ɛwm ol agɛ eke bi kok ów amamn a eci; kɔ ów ɛɲɲ ɛsɛl lel agɛ ek'élum ol ab ab sɔsiɛm wɛl b'ɛw ol, ɛsɛ: molokm ɛɲɲ ɛsɛl, sikpl ɛsɛl, agɛ ek'élum Nyam lel ob ek'el lala ab ab, agɛ eke b'ibi el ɛsɛl oglog el lisɛl lel agɛ ibiu fɛɲ ab. <sup>10</sup> Ɛmɛny wɛl b'ɛw ol agɛ eke b'ij nfaci a eci, ɛɲ eke b'ɛrum el lawlɛl ɛɲ ab, agɛ eke b'ol madu ij, ayadɲu, agɛ eke b'ij danɲu yadɲ ɛm lel agɛ fɛɲ eke bi kok ów ek'elm low yɛgm nawrɛ tasi ab ab eci. <sup>11</sup> Low yɛgm ikɲ na anɲ Amani Mamn a eke b'ɔɲ ɛy s'uw Nyam ec'anygbɛl ab any ab ɛm. Ɛɛ, Nyam eke el ehe fɛɲ eci nuɲ a anake abul'm Amani Mamn na a.

*Pɔl am ɔɲ Jesu Krist bia*

<sup>12</sup> M'am ɛlu Jesu Krist ɛy Ɛs Kɔtɔkɔ eke ɔɲ'm lɛɔ, ɛm e juma kok ec'a bia. M'am ɛlu'l bia eke n'ɔny ɔmn ɛm ɛm, ke l'ɛsɲ'm in e juma ab ɛm, <sup>13</sup> eke lɛɲɲ ek'ɛɔ ab ɛm, mi dad in e lís ec'ów ɛɲɲ, m'ijr'r gbɛɛ ɛɲɲ mi wɛwr'r yɛɲi. Gbɛkɔ Nyam ɔny ɛm e sɔɲɲ ikɲ, anɲke m'ɔnym ɔmn in ɛm ɛɲɲ m'uwm low eke m'am kok ab any. † <sup>14</sup> Ɛy Ɛs Kɔtɔkɔ ɛdɲ'm ɔwrɔ nɔnɔ, ɛɲɲ n'ɔɲ'm ɔmn lel erur eke b'anɲ Jesu Krist ɛm ow ab ab. <sup>15</sup> Kin odad nawrɛ tasi ek'it ek'agɲ a fɛɲ k'eb: Jesu Krist ow wus na af sikpl ɛsɛl fɛɲ e sɔɲ eci. M'el el ɛm e ligbɛl tasi, <sup>16</sup> gbɛkɔ ow sɔsiɛm anake Nyam ɔny ɛm e sɔɲɲ ikɲ a: l'erur eke Jesu Krist k'ɛcr ɛm eke m'el sikpl ɛsɛl ab ɛm e ligbɛl tasi a yɛgm in e low eku eke n'ɔny, ke ow ɛl sɛwl agɲ a eke

† **1:13** Ob Kok 8.3; 9.4-5.

lægñ anym em b'ow ub'r nawrε, ke b'ow eññ sel ek'onym nuñ a eci.

<sup>17</sup> Sos usr lele anygbel ab él Eb ebu a ek'anñ seğñ  
fεñ,

onym uw,

wel éknm

ke el Nyam nyam coco a eci! Amen.

<sup>18</sup> Em jim Timote m'am abul'ñ low yeğm na, εσε elel eke η e Nyamel ab em e kokoba ob esel ikñ anym dad εw es η e lís ab af. Ke sodad amua átr'ñ sos es òñ oğñ mum mamn a, <sup>19</sup> η ec'omn a lele η e tutr mamn ab ab em. Agñ nyam nyam eğñm òsum el e tutr mamn a, ow òñ -l'irmn el ec'omn a. <sup>20</sup> Agñ ab em Imene lele Alesandr ab yeji anñ; m'ot m'ok el Satan abu em † yec'εtñ ke læğñ ejeci -li k'òbrmn Nyam any.

## 2

### *Elel eke wel ki ηçññ Nyam*

<sup>1</sup> Low krekre eke m'am dad eke wel ki kok agñ fεñ ec'a el: ke wel ηçññ Nyam íbrm'n low, kók sòñ ke élul' bia. <sup>2</sup> Ow it eke wel ki ηçññ Nyam òñ éb ebu fεñ lel agñ fεñ ek'onym es εw ab a, yec'εtñ ke s'ótu s'ir éb ek'erm mij anm em, erm es εy em, sos us em, Nyam ec'es ucu òny tasi em.

<sup>3</sup> Na anake akpl ke el sòbo Nyam εy e Sòğ Es,

---

† **1:20** *m'ot m'ok el Satan abu em*: odad na anake wel òny εwl meny 1 Korεnt 5.5 em, ke am yeğm ek'εğñ kok low ηññ a, wel b'ogñ'n Nyam nuñ igñ esel a ec'aranñ, wel εw'r saw læğñ tεl eci eke li k'itññ, ów a eke li kok a sosisem. Sica, ek'εğñ ikñ na anm Nyamel em ij a, ke Satan eke ònym wus ab a, ec'ów em l'εwl n'anñ a (Jan 12.31; 16.11; Efes 2.2).

<sup>4</sup> eke b'erur ek'agñ fəñ k'əññ sel, † ke ótu uw low nenyembri nyam any a.

<sup>5</sup> Tasi em a Nyam nyam ce anñ, etñ in lel agñ ab ec'araññ a yeji eññ nyam ce anñ, eññ a in l'el Jesu Krist

<sup>6</sup> ek'ocr in sosi ew awoba agñ a fəñ e sɔg eci. † Ek'ow e ləññ a ow a, l'elu ɔkm li yeɣm eke Nyam erur ek'agñ fəñ k'əññ sel. <sup>7</sup> Na sosiem anake Nyam ew'm lebl elu es lel erm es ab, ke mi yéɣm agñ ek'elm Jwifel yec'eke el ɔmn lele low nenyembri nyam ab a. M'ɔnym yadñ, low nenyembri nyam m'am dad.

*Ellele eke wəl ki ñɔññ Nyam dedeku em*

<sup>8</sup> M'erur ek'usu fəñ, eññ ki gbigbl sabu oññ afr ñɔññ Nyam, gbekɔ Nyam ñɔññ a él erm lala em, erm ek'erm bebl lel ów es atar ab anm em.

<sup>9</sup> M'erur yej'eke ɔyɔw ki s'us mob ek'it, mob frafra ce, ke ow k'elm low agbr em; ke -li ki kokmn sin ek'agñ k'ekñ el, -li k'okmn sika em miyob, miyob ac lele mob sus em eke b'il an nɔnɔ ab, † <sup>10</sup> kɔ ke el e sakpl a él ów amamn e kok, ese elele ek'ow it ek'ɔyɔw eke bi dad ese el b'elum Nyam a, ki kok ab af. <sup>11</sup> Ow it ek'ɔyɔw k'ok es tiñ iri low yeɣm a, elum ligbel em. <sup>12</sup> M'elum abusu es eke yɔw ki yeɣm iññ low oglog ew iññ es; ow it eke li ki yewal tiñ. <sup>13</sup> Tasi em a, Adam anake Nyam ikñ anym kok a, etñ ow e jam a li kok Ev. <sup>14</sup> Etñ emeny, ow elm Adam yeɣm wəl ejum'n, kɔ yɔw yeɣm wəl eju'r etñ eluam Nyam ec'odad ebl a. † <sup>15</sup> Eɣen yeji, Nyam b'ow sɔg'r in

† 2:4 Ezekiel 18.23. † 2:6 Matie 20.28. † 2:9 Bèbmn 1 Pier 3.3. † 2:14 akr 13-14èkn Nunj ɔb 2.7, 21-22; 3.1-6.

ec'ey eke li b'ow l'ew ab em, † gbekɔ ow it eke li k'ony ɔmn, erur, ke l'ír eb eke elm low agbr em ke b'akpl Nyam sos em.

### 3

#### *Nyamel idr esel ec'ów ɔm*

<sup>1</sup> Kin odad nawre tasi: eke eɣɣ nyam erur eke k'el Nyamel ec'idr es, ke juma senyn l'erur a. <sup>2</sup> Ow akpl eke Nyamel ec'idr es k'el eɣɣ ek'abr enym anm lís; yow nyam ec'igɣ, † eɣɣ eke b'ok sos es low em, ke b'ony any es ok. Ke n'ony es an mamn, l'él eɣɣ eke b'eb etu, ke ɔtu eke ki yeɣm agɣ low. <sup>3</sup> Li k'élm mar eɣɣu, li k'ónym ganɣan, kɔ l'él frɔɔ lel erm es eyr es ab. Li k'élm eɣɣ e b'erur os owi, <sup>4</sup> kɔ l'él eɣɣ ek'otu eke ki nyimn in obi ec'akɣ a, eɣɣ ek'in ec'ey a b'ony in ec'elum. <sup>5</sup> Tasi em a, ek'eɣɣ nyam ɔtum nyimnm in obi ec'akɣ a, ayaf l'otu eke li ki nyimn Nyamel ee? <sup>6</sup> Li k'él eɣɣ ek'itɣn erm em owr owr; ek'ow el eɣɣ eben, li b'ow l'eb sos ew abu em etɣ li b'ow n'ony es abur ese agn ec'ab af. <sup>7</sup> Ow it yeɣi ek'agɣ ek'ubm Krist nawre a k'elum'n, yec'etɣ ke li k'ónym cak, ke li k'éym agn e simeb e b'uk ab em. †

#### *Nyamel em eci diakrel ec'ów ɔm*

† **2:15** *Nyam b'ow sog'r in ec'ey eke li b'ow l'ew ab em:* aɣa Pol erur eke ki yeɣm yow eci low tasi eke Nyam erur eke k'abul a. Etɣ emeny l'erur eke li k'ony agɣ beb eci tutr a eke el yow ec'igɣ ebim owi a, l'oc es. † **3:2** *yow nyam ec'igɣ:* odad na Grek em wel ɔtu eke k'itɣn ejec'em dad ese: *ke ow él akp nyam ce li k'ebi yow.* † **3:7** akr 2-7 b'èbm Tit 1.6-9.

<sup>8</sup> Diakrɛl yeji it ek'el agɛ eke k'us sos, ke ɔny nɛnyɛmbri nyam yeji; ow itm eke -li k'ɛgɛ mar nɔɔɔ, -l'ɔl yadɛ em eci os ɔny es; <sup>9</sup> ke -l'ucu low nawrɛ ek'ɛy ɔkm Krist ec'ɔmn e -n'ɔnyn ab em a -n'ɔny es tutr lala em. <sup>10</sup> Ow it ke wɛl ɪkɛ anym ɛbm ɛl ɛkn; ek'ow e jam a wɛl ɛknm low ɔbr ɛl e lɪs a, ke sica -li kok juma ɛsɛ diakrɛl af gɔɛ. <sup>11</sup> Ɔyɔw eke el diakrɛl a † yeji it eke k'el agɛ eke k'us sos. Ow itm eke -li ki dad ɛl lawlɛl e lɪs ec'ɔdad ɛɛɛɛ; ow it ke -n'ɔny any es ok, ke -li kok ɛɛɛ low low fɛɛ em. <sup>12</sup> Ow it eke diakr k'el yɔw nyam ec'igɛ, ke n'ɔny abusu eke li ki nyimn in ec'ɛy a, lel in ec'akɛ a nimum ab mɛwl em. <sup>13</sup> Diakrɛl eke bi kok ɛl e juma mɛwl em a, agɛ a fɛɛ b'ow usr ɛl sos ɛtɛ -li b'ow -n'ɔny lokm susu ligbɛl ɔmn a ek'ɔny okr ɛy af Krist ab ab em.

### *Low e lol es ke ɛy ɔkm*

<sup>14</sup> M'am awɛɛɛ lɛl na, kɔ m'am tutr eke mi k'ow m'ɛkn'ɛ lɛgɛ tɛl em. <sup>15</sup> Gbɛkɔ eke mi k'owm, b'ow ɛkn eɛl eke k'aan es Nyam e bosu ab em lɛl na e m'am awɛɛɛ ab em. Nyam e bosu a el Nyam ek'awɛ owr ec'agɛ a, ek'ucu low nawrɛ ɔny es a. <sup>16</sup> Tasi, low a e lol es ke ɛy ɔkm ɛy ec'ɔmn ab em a agb nɔɔɔ! Low a el:  
 Krist ɛy ɔkm ɛsɛ ɛgɛ af,  
 Abɛ Lala ɛlu'l ɔkm ɛsɛ ɛgɛ nyim nyim af  
 ɛtɛ afr ɛrm ɛsɛl ɛkn'n. †  
 Wɛl ɔb in ec'amani ok sɛbr ɛjeci ec'agɛ a,  
 ɛtɛ agɛ nɔɔɔ ub'r nawrɛ wus af aɛa,

† **3:11** Ɔyɔw eke el diakrɛl a:ɔdad na Grɛk em a wɛl ɔtu eke k'itɛɛɛ ɛjec'em dad ɛsɛ diakrɛl ec'ɔyɔw a yeji... † **3:16** Rom 1.4; 1 Pier 3.18: afr ɛrm ɛsɛl ɛkn'n: bɛbm 1 Pier 1.12.

ετη n'im afr anygbel em.

## 4

### *Agη eke b'oc ów yadh yegmn agη low*

<sup>1</sup> Abη Lala dad erum mar nine: seγη es abal el em a, agη beb b'ow igη el ec'omn a elu es, ke ús sow tutr yadh lele low yegm eke b'annη abη enηη em ow a jam. <sup>2</sup> Agη enyembri yony yony esel lel ayadηu ab b'ow irmn el. Agη amua, el agη eke Nyam owi am dadm low kaka, ke el e sow tutr a anη ese ob eke wel oc lowi gbagba ewr meny af. † <sup>3</sup> Agη amua el eci low yegm ab em b'ow dad ek'ow itm ek'agη k'ebirir, -li b'ow -l'edηn mob beb eke wel b'ij a. Kc Nyam kok ob ij amua yec'ετη ke agη a ek'ub nawre, ke uw low nawre any a, óη'n bia ke ij. <sup>4</sup> Ob feη eke Nyam kok a akpl; † kaka anm em eke wel k'igη elu es, gbeko b'eb a k'ópim eke k'elu Nyam bia, <sup>5</sup> anke Nyam odad lele Nyam ηcηn ab b'cη ob feη el nimamn Nyam ec'any af.

### *Él Krist e juma kok es mamn*

<sup>6</sup> Eke b'oc low yegm na elu ckm agη lisijimel em, b'ow el Jesu Krist e juma kok es mamn, ετη b'ow yegm ek'omn e sodad ebl a lele low yegm tasi a ek'εηη Abη em a, b'iyr'η lok. <sup>7</sup> Gbeko igη sawl odad eke low kaka anm em ke ókrm af omn ab a èlu es, ke ótur sos akηm Nyam ab η ec'εb ir em. <sup>8</sup> Sos cetur sos megl af ec'a el low akplu,

---

† **4:2** *wel oc lowi gbagba ewr meny*:el low ek'annη wel bi kok legη anym em a ów enηη kok esel lele madu e b'uru es ab ab. Ob eke wel b'oc lowi gbagba at a, el ob eke b'itr, ob eke b'uw. † **4:4** Bèbmn Nunη Jb 1.31.



ko low tel em ce. Ko Nyam ec'aknm ab a el low ek'akpl low fɛn em, anke ow b'ɔn ɛy s'ir eb Nyam ab yefɛnyana em etn ow b'ɛwar ɛy lɛgn anym em ec'eb ir a. <sup>9</sup> Na el odad ebl tasi ek'it eke agn fɛn k'ɛgn eb. <sup>10</sup> Tasi em a, s'am ij gbre si kok juma etn s'am atr sos es, anke s'oc ɛy e low ɔmn s'elu Nyam ek'ann owr ke el agn fɛn e Sɔg ɛs ab em, ab brobro agn a ek'ub nawre a. <sup>11</sup> Kin ów eke kí dad ke yégm agn.

<sup>12</sup> Kì yeb ɛgn kaka k'iir'ɛ es anke el nɔbafrelì sosiem; ko èl agn ek'ub nawre a e sewl: n e sodad ebl em, es an em, erur em, ɔmn em lele n e lala el tasi em ab. <sup>13</sup> Gbuɔ ke m'ów a, àt any awl Nyam e Silɛl a dedeku ec'any af, ɔm el ów ke yégm el low. <sup>14</sup> K'ijl Nyam ec'ob ap a ek'ɔny ann'ɛ em ab es, yec'a ek'ɛn lɛgn a eke n e Nyamel ab em e kokoba ɔb esel dad ow e low, ke agn ekpekp a at'ɛn abu nuɔ a. <sup>15</sup> Àt any kok ów amua fɛn, òcr n sosi nimum elu juma eke wɛl abul'ɛ ab em, yec'ɛn ke agn a fɛn ékn n ec'anym imn a. <sup>16</sup> Ɔsur n sosi lele n e low yégm ab ab. Inym es kikri ow af. Tasi em a, eke bi kok ɛben, b'ow ebr n sosi elu es etn b'ow eb agn a eke b'iri n e sodad a yeji.

## 5

### *Ów eke Timote k'om kretienel a fɛn*

<sup>1</sup> Eke ann ɛgn likpekp ab, kì dad'r odad læc em, ko ɔm'n ów lebl es ok em esɛ asɛ † ce ow'n el af. Òc nɔbafre oto esɛ esɛ jimɛl af, <sup>2</sup> ɔyɔw ekpekp

---

† 5:1 Ob Ap 19.32.

εσε esηel af, ededyow oto εσε esη jowel af erm lala tasi em.

### *Eηnyow eke onym agη a*

<sup>3</sup> Ξw eηnyow ek'onym agη a e low any. <sup>4</sup> Gbεkɔ eke iηnyow nyam ony ey oglog alaw ek'otu eke ki kok in e lís e low a, ke -li wewr -l'elu el ec'omn a okm el obi ec'akη a e lís, ke ow óη -l'owr el ec'agη a ec'ów eke kok ony el a, anke ow el low eke Nyam erur. <sup>5</sup> Iηnyow ek'onym eηη kaka eke ki kok in e lís e low a, oc in ec'omn a εw Nyam af, εtη li bi ηonη Nyam ncok lele lεγη owr ab l'ibrm ow abu elum. <sup>6</sup> Gbεkɔ iηnyow eke b'us in ec'ów aw owi jam a, abη em a l'uw η̂, eke n'anη owr sos megl em bɔbɔ yeji. <sup>7</sup> Low na anake it eke k'okn el a, yec'εtη ke wεl k'έηnm abr enym owi el e lís. <sup>8</sup> Eke eηη nyam éwm in ec'agη e lís e low any, ab brobro in obi ec'akη ec'agη a, l'εgbr in ec'omn a εtη n'uy l'akm eηη ek'ubm Krist nawre a.

<sup>9</sup> Gbuη ke nón iηnyow nyam e nin eηnyow e lel ab em a, ow it eke li k'onny akpo eκη nyahan. Ke l'él yow ek'onny igη akp nyam ce, † <sup>10</sup> ke wεl úw'r any in ec'ów amamn kok em, ke l'él yow eke gbagbl in ec'ey a mεwl em, ony erm mamn etu ec'eb em, ony agη ek'ub Krist nawre a mij yoyog

---

† **5:9** Eηnyow a ek'it eke Nyamel k'elum abu a ec'en b'anη lel ab em. *Ke l'él yow ek'onny igη nyam ce:* odad na Grek em a wεl otu eke k'itηη ejeci em dad εσε: *l'él yow ek'onny nεny nyam in ec'igη a e lís.* Bεbm̄n 1 Timote 3.2 lele ow ec'akr otar ab ab

akr es, † atm gbre esel abu ke kok ów amamn nɔnɔ gbɛl.

<sup>11</sup> Eɲnyɔw ek'anɲ ɲgbafre a, k'èlu el nin lɛl ab em, aɲke igɲ ebi owi b'ow el nuɲ em a, -li b'igɲ Krist -l'èlu es, <sup>12</sup> etɲ ow b'ɔɲ el -n'ɔny jɛj ok aɲke -l'irmn el e krekre e nɛny ij a ow e lís. <sup>13</sup> Etɲ emeny, eke -n'ɔnym low kaka eke -li ki kok a, -li b'eb akɲ akɲ ec'ec abu em; etɲ yec'eke akplm tasi a el ke -n'am cacak agɲ, -n'am dad ów ek'otm el es, -n'am bebar nɛnym low fɛɲ em. <sup>14</sup> Na sosiem m'erur ek'eɲnyɔw ɲgbafre a k'ɛwl ebi egɲ, ew ey, ke nyímn el ec'akɲ a mɛwl em, yec'etɲ ke -li k'ɔɔmn ey ec'efnu a abusu dadm ey ów eɲɲ. <sup>15</sup> Tasi em a, eɲnyɔw ab em nyam nyam ɲgboɲ ejagb nyim nyim ab af, am us Satan jam. <sup>16</sup> Eke nawre ub lis nyam ec'agɲ ab em eɲnyɔw anɲ, ow it eke li k'elum wɛl abu, ke li k'ígɲm l'elum wɛl es eke Nyamel k'ekn el e lís owi. Ke ow óɲ Nyamel ɔtu elum eɲnyɔw ek'anɲ el sɔny a abu.

### *Nyamel nyimn esel ec'ów ɔm*

<sup>17</sup> Agɲ ekpekp a eke bi nyimn Nyamel mɛwl em a it eke k'ɛɲɲ labm sɔg yony, † ab brobro el a eke b'ij gbre dad Nyam odad, ke bi yɛgm agɲ low a. <sup>18</sup> Low tasi eke Nyam Lɛl dad a el: *K'ow*

---

† **5:10** *mij yɔyɔg akr es:* mij eke wɛl b'ɔɲ utu oglog etu agɲ yɔyɔg akr es a, el low ek'ucur Jwifɛl ogɲ ec'etu eb a (Luk 7.44). Gbɛkɔ aɲa, Bibl any uw esel b'ekn low na ɛɲɲ yony: esɛ low eke yɔw mamn bi kok agɲ lisijimɛl e lís af oglog esɛ ów amamn fɛɲ eke li bi kok n'ɔɲ agɲ lisijimɛl ab af. † **5:17** *it eke k'ɛɲɲ labm sɔg yony:* odad na Grek em a wɛl ɔtu eke k'itɲɲ ejec'em dad esɛ: *wɛl ɔɲ el any akm el lawlɛl a.*

*ocmn meb onynmn id eke wel ucu meb am kikn may es a neny es, etn: Juma kok es it eke k'ehn in e labm sog.* † <sup>19</sup> Eke wel oc egn likpekp nyam eke wel am ok ów af ow η ec'any af, k'ègn ow e low k'eb, eke irim adan̄ku yony oglog nyahan e neny. † <sup>20</sup> Agn yec'eke kok sikpl owi a, ènym el abr dedeku a nimum ec'any af, yec'etn ke agn likpr a úru low.

<sup>21</sup> Kin low yec'eke m'am ibrm'η tasi em Nyam ec'any af, Jesu Krist ec'any af lele afr erm esel eke Nyam sɔsum ot ab ab ec'any af: èlum ów amua ke ow k'elm enyembri yony yony em, ke k'ánm egn kaka jam. <sup>22</sup> K'ògn es k'at egn abu nuη k'abul il juma Nyamel em. K'èlu abu awl̄ηel e sikpl owi em; η obi a àn̄η lala.

<sup>23</sup> K'ègn mij sony coco ce, kò egn mar tel η eci lokm a sosiem, an̄ke ol ówm'η ony. <sup>24</sup> Agn beb e sikpl a b'eru es kpata wel ekn gbuη eke wel ki jej el e low ok a, kò agn likpr ec'a, jej ok a b'uw̄r gbuη etn wel b'ekn el e sikpl a. <sup>25</sup> Ów amamn yeji wel b'ekn el kpata, etn el a eke wel éknm kpek̄n a yeji ánm es lol em ibnm.

## 6

### *Madu lel el eci es ew esel ab ab ec'ów om*

<sup>1</sup> Agn a feη eke el madu a it eke k'on̄y elum nɔnɔ ligbel el eci es ew esel a e lís, yec'etn ke egn kaka kí dadm low ηuη okm Nyam e nin a lel ey e low yegm ab ab af. <sup>2</sup> Madu a eke ony es ew esel eke el naw̄re ub esel a, wel el el lisijimel. Ee

† **5:18** Ol Ɔkn 25.4 lele 1 Korent 9.9; Matie 10.10; Luk 10.7.

† **5:19** Ol Ɔkn 19.15.

nawre! Gbɛkɔ ow elm na sosiɛm -li k'ɔbrmn wɛl any. Tasi ɛm a, wɛl e lís owi anake it eke -li ki kok tasi a, aɲke agɲ a eke -n'am kok juma -n'ɔɲ a, el ɔmn ɛsɛl eke Nyam erur. †

*Low yɛgm yadh lel ob ɔny tasi ab*

Kin low ek'it eke ki yɛgm agɲ ke ɔɲ ɛl -li kok a. <sup>3</sup> Ek'ɛgɲ nyam am yɛgm agɲ low ɛjeci ɛtɲ n'am ign ɛy ɛs Kɔtɔkɔ Jesu Krist e sodad tasi a lele low yɛgm a eke el ɛy ec'ɔmn ec'ab ab l'ɛlu es, <sup>4</sup> ke l'el ɛgɲ eke es ɛfu iy ɛm gbɔɲ ɛtɲ l'uwm low kaka any. L'el ɛgɲ e b'erur ów es atar owi ke b'ogɲ mum odad ebl sosiɛm. Yɔgɲ ɛm ec'ów eke b'anɲ ow a el: nyamn ɛyr, ów ɛsu, ɛgɲ wɛwɛr, sow tutr yadh ɛgɲ e lís, <sup>5</sup> lel ów es atar eke úwrm, ke b'anɲ agɲ eke nuɲ ɛm okm es, ke irmn low nɛnyɛmbri nyam e dad a ec'araɲn. -Li bi tutr ek'ɔmn eke wɛl b'ɔny Nyam ɛm a el ebr eke wɛl b'eb ɔnyn ob af.

<sup>6</sup> Tasi, ɔmn eke wɛl b'ɔny Nyam ɛm a el ob ɔny ligbɛl, eke wɛl b'ɛgɲ yec'a ɛɛ eke wɛl ɔny a eb. <sup>7</sup> Tasi ɛm a, s'isam ob kaka ab wus na af ɛtɲ si k'ow s'ɔtum s'ɛwlam ob kaka ab. <sup>8</sup> Na sosiɛm eke s'ɔny ob ij lele mob sus ɛm ab ɛɛ, ke ow ɔɲɲ ɛy ɲ. <sup>9</sup> Agɲ eke b'erur eke k'ɔny ob a, b'ɛy mɛju owi ɛm ɛtɲ low aw nɔnɔ lele low ɲɲɲ ab b'ɔgɲm ɛl meb ɛtɲ b'ɔny ok ɛl wus ɲɲɲ ɛl. <sup>10</sup> Tasi ɛm a os ec'erur anake el ów ɛɲɲ fɛɲ e min a. Agɲ bɛb ec'a, os a ec'ɔny e low aw afɲɲ ɛl es tɔɲ ɛtɲ -li kpab es ɔmn e lís ɛtɲ -l'ijr ɛl ec'erm a gbɛr ow sosiɛm.

*ɔmn ɛm e mum mamn ec'ogɲ*

† 6:2 Bɛbmn Kolos 3.22-25.

11 Gbɛkɔ ɲ eke el Nyam ec'ɛgɲ a, àru ów amua fɛɲ egb es. Ól nɛny nyam ij es, ùcu Nyam ɔny es, ir ɛb ɔmn ɛm, erur ɛm, low eku ɛm lele frɔrɔ el ɛm ab. 12 Ògɲ ɔmn ɛm e mum mamn a, ùcu sel ek'ɔnym uwr a ɔny es anke Nyam ɛsɲ'ɲ eke k'uw sel ɛɲɲ ikɲ na any, lɛgɲ a ek'agɲ nɔnɔ ec'any af ij ɲ ec'ɔmn tasi ek'ɔny e danke a. 13 M'am ijl'ɲ nɛny Nyam eke b'ɔɲ ob fɛɲ sel ec'any af lele Jesu Krist ek'ij ɔmn tasi e n'ɔny a e danke Pɔns Pilat † ec'any af a e nin ɛm. 14 Èlum ów a eke mi dad'ɲ a, ɔsu ów a lala ɛm ek'abr ɛnym k'ánm ɛm tɔɲ bake igɲ lɛgɲ a ek'ey Ès Kɔtɔkɔ Jesu Krist b'ow ɛwl ow a. 15 ɛgɲ a eke b'ow ɔɲ Krist ɛwl ow lɛgɲ a eke li bɛbm l'ɛw es a el Nyam.

L'el ehe e nuɲ lel ob fɛɲ ec'ɛs ɛw ɛs ab, ɛb ɛbu ɛm ec'Èb ɛbu lele kɔtɔkɔɛl ɛm e Kɔtɔkɔ † ab.

16 In cɛ li k'ɔtum l'uwm.

L'ir usuayl usu ek'ɛgɲ k'ɔtum titam.

ɛgɲ kaka ɛknm'n ɛɲɲ ɛmɛny ɛgɲ kaka k'ɔtum ɛknm'n.

Sos usr lele abusu ab él in eci ɛgɲ fɛɲ! Amen.

### *Egbreɲgbi ec'ów ɔm*

17 Dàd wus na af ec'egbreɲgbi a, -li k'ɛwr sos, -li k'ocr el ec'ɔmn a -li k'ɛwr ob ɔny na eke b'uwr ab af, kɔ -l'oc el ec'ɔmn a -l'elu Nyam ɛm, in eke li b'ɔɲ ɛy ob fɛɲ ɛrm mamn ɛm ɛy e low kok ec'a. 18 Dàd el -li kok ów amamn, -l'ij gbreɲgbi ów amamn kok ɛm, -l'el ɛrm mamnu ke -l'el agɲ eke bi cɛc ob el lawlɛl ab. 19 Eke -li bi kok ɛbɛn, -li b'ow -l'as ob ɔny mamn ek'ɔnym uwr a luku lɛgɲ

† 6:13 Jan 18.36-37; 19.11. † 6:15 Ol ɔkn 10.17; Selu 136.3.

anyim em eci, yec'etj ke -n'ejn owr anj nawre tasi a.

*Ów om es abal el*

<sup>20</sup> Libowi Timote, osu mewl em yec'a eke Nyam abul'j a. Àru nenym ot eke low kaka anm em, ke ókrm af omn ab a lele sodad ek'agj b'ub nunj em ony e sodad a egb es. <sup>21</sup> Tasi em a, agj beb ij neny dad eke el ony nunj em ony ikj na etj -li kpab es omn e lís.

Ke Nyam ec'owrɔ a ánj ony ab.

**Amani Owr**  
**Adioukrou: Amani Owr New Testament**

copyright © 1998 Wycliffe Bible Translators, Inc.

Language: Adioukrou

Contributor: Wycliffe Bible Translators, Inc.

All rights reserved.

2020-11-10

---

PDF generated using Haiola and XeLaTeX on 21 Feb 2024 from source  
files dated 29 Jan 2022

b20fd1e5-39e1-5678-9af9-b99e1ebfb994